
Liliana Patti



Liliana Patti è nata e vive a Castellammare Del Golfo.

Scrive poesie dal lontano 1972, esprimendosi tanto in lingua Italiana quanto in lingua Siciliana, innestandosi nel solco della nobile tradizione della poesia Castellammarese.

E' dotata di uno stile personalissimo che si caratterizza come messaggio della sua umanità.

I suoi versi sono stati definiti: “ incisivi ed eleganti” essendo dotata di una personalità sensibile alle varie problematiche sociali.

Ivi a la fera
a 'ccattari lu tirruni
chiddu a tri culura
chi piaci a me matri.
Accattari lu tirreni
vosi jiri
pi turnari a li tempi
antichi
quannu la calia e la semenza
eranu l'unicu passatempu
di la genti.
Cu lu tirruni
si facia festa
quannu li cavaddi
currianu
'na la strata larga.
'Na stu munnu
chi persi la spiranza
lu tirruni è russu,
viridi e biancu
comu la bannera
di la me terra.

Li picciotti
di 'sti tempi

‘un ‘accattanu turruni
mancianu nutella
e schifiarji
nun pensanu a la bannerera
picchè sunnu zingari
di lu munnu.
Ora anchi si accattu
lu turruni
mi sentu persa
‘n menzu a tanti foddi.



Ventu di primavera

Ciuscia lu ventu
di primavera
chiddu chi metti
sutta 'n capu
li pinzera.
Mi sentu
comu s' unn' avissi
l' anni chi aju
picchè stu ventu
mi fa turnari 'nnarrè
quannu curria spinsirata
contro lu ventu
chi m' ajsava la suttana
e si purtava nta l' aria
li capiddi mei.
Turnasti ancora
ventu calurusu
ma 'unn' aisi chiù
la me suttana
li capiddi
c' addivintaru bianchi
a ttia 'un t' interessa
di scunzari.
Turnasti pi chiddi
chi pensanu chi lu

munnu 'un firria.
Ppi mia firriau lu tempu
e anchi si torni
a ciusciari
'un poi scunzari chiù
li me pinseri,
poi mettiri
sutta 'n capu
sulu lu me cori.

A me matri

Matri,
vogghiu stari
vicina a ttia
pi 'un pirmettiri
a lu tempu
di signari ancora
la to facci.
Tra 'na ruga
e nautra
teni li peni
di la vita.
Na lu silenziu
di li to occhi
chi si perdinu
luntanu
leggiu lu rimpiantu
pi lu patri
chi si nniju.
Ti chiamu
cu 'na carizza
di la manu
e quannu li nostri
occhi s' incontranu
un surrisu illumina
l' occhi toi.

Antonino Pedone



Nato a Castellammare del Golfo il 19/10/1941, coniugato con un figlio, pensionato, dipendente, dal 1963 al 1990, della Petrolgas, dal 1990 fino al settembre del 1998 della Elf gas italiana, infine, dall'ottobre del 1998 all'ottobre del 2010 amministratore unico della Sikelia gas. È stato consigliere comunale dal 1972 al 1982. sindaco dal febbraio 1977 all'ottobre del 1980 e dal luglio 1981 al luglio 1982.

Ha ereditato dalla mamma la passione per la poesia. Ha cominciato a scrivere in dialetto siciliano negli anni '60: ha pubblicato, nel 1989, un volumetto contenente una cinquantina di poesie aventi come oggetto i sentimenti verso i suoi cari e le difficoltà incontrate nel suo impegno di amministratore.

Una sua poesia "L'urtimu salute" si è classificata al II posto nel concorso poetico Peppino Caleca organizzato nel 1998 dal Comune di Castellammare del Golfo e dall'Associazione "Triqueta". Un'altra sua poesia "Lu cani muzzica lu chiù sfardato" si è classificata anche questa al II posto nel primo concorso nazionale "Vangelu Nicu" organizzato nel 2010 dall'Associazione "Triqueta" e dal Cenacolo di poesia dialettale "Vincenzo Ancona".

Lu cunigghieddu

Mentri chi, nna l'estati, abbivirava
vitti, ddà vicinu, un cunigghieddu,
scantatu, di 'na botta, s'acquattava,
spirava di scappari, mischineddu.

Facia 'na cursicedda e si vutava,
a mia taliava e nun lu cumprinnia
com'è chi 'ddu cristianu nun sparava,
di quali stirpi bona discinnia.

Ci avianu 'nsegnatu li chiù anziani
di stari attentu a l'omu cacciaturi,
chi sunnu tutti tinti li cristiani,
ognunu d'iddi vili e traritari.

Perciò s'addumannava e nun capia
com'è chi 'ddu cristianu lu taliava,
com'è chi la scupetta mancu avia
e si pi fissa iddu lu pigghiava.

Pinsau 'n'anticchia e poi si cummenciu
chi era sarvu e si putia fidari;
darrè 'na caia 'ntisi un murmuriu
di omini già pronti pi sparari.

Un corpu nna la frunti lu pisciau,
un corpu di 'na manu traritura;
lu cunigghieddu siccu ci arristau
pinsannu a 'stu munnu di lurdura.

Lu poviru e la libertà

La libertà è comu 'na magia,
ognunu la vulissi conquistari,
la teni stritta, allura, e la talia,
cu idda si vulissi 'nprufumari.

Lu riccu si la strinci e si l'abbrazza,
la vasa, la difenni, la sussia.
Comu un nutricu si la metti 'n vrazza,
la cura comu cosa di valia.

Unu cu lu pitittu addimuratu
cu chissa libertà chi ci pò fari?
Un poviru cristianu sfurtunatu
la libertà ch'aiutu ci pò dari?

E' liberu cu' havi e cu' pusseri
e nuddu e nenti havi di circari.
Lu poviru, cu tutti li pinseri,
è liberu la testa di calari.

Svigghiari li menti

Li nostri vucchi accucchianu paroli
chi toccanu li cori addummisciuti,
chi, caminannu, formanu violi
'ntra terri senza tempu scanusciuti.

Sunnu paroli frischi e 'ncudduriati
chi parranu a li genti camuluti,
li spincinu a nun fari li 'ntamati
virennu comu sunnu arridduciuti.

Sunnu paroli ditti a cu' li senti,
a cu' si movi sulu si l'ammutti,
sunnu diretti a 'stranii e canuscenti,
a chiddu chi t'ascuta e 'un si nni futti.

Li nostri occhi chini di la luci
talianu 'ssi vucchi 'nzuccherati;
l'aricchi vivi sentinu 'ssi vuci
chi svigghianu li menti rifardati.

Si leva, forti e chiara, la spiranza,
si viri l'orizzonti allucintari,
si senti comu un cantu 'n luntanza
chi fa li nostri sensi arripigghiari.

Li vicchiarreddi

Eu pensu a tanti afflitti vicchiarreddi
chi fannu malavita pi manciari,
si sucanu la sarda, mischineddi,
chì la pensioni nun ci po' bastari.

'Sta massa cunnannata pi suffriri,
doppu tant'anni assai di travagghiari,
tra lacrimi abbunnanti e tra sospiri,
è junta, strati strati, a dumannari.

Su' tutti spersi sutta un scuru mantu,
virennusi chiù tinti arridduciuti,
tra larmi, tra turmemti e cu lu scantu
di essiri chiù stanchi e chiù ammusciuti.

Nuddu ci pensa a chissi sventurati
chi patinu li peni di lu 'nfernu;
e nun ci ponnu mancu marruggiati
pi chiddi chi ci sunnu a lu guvernù.

Ci fussi 'ssu distinu di canciari
chi 'ntossica lu cori a tanti e tanti;
'ssi puvureddi c'è di sustintari
facennu quarchi sforzu tutti quanti.

Si, nni la società, nun c'è rispettu
pi chiddi chi su ' vecchi e sfortunati,
nun c'è giustizia e mancu c'è risettu;
a mali tempi semu destinati.

La me vicchiaia

Trasiu comu si fussi la patruna
nni la me vita tutta stenti e chiai.
Satau, tutta cuntenti, 'ddi scaluna,
capivi s'aggravaru li me guai.

Cu forza s'aggrappau a la me pirsuna
chi nun la potti mancu scutuliari.
Ognunu, quannu è tardu, si nn'adduna
chi è 'na brutta bestia di scansari.

Ora chi l'haiu di 'ncoddu chi c'è fari?
L'abbrazzu comu fussi 'na parenti;
'ssa cosa laria mi l'è suppartari
cu tutti li tristizzi e li turmenti.